

**FORSKRIFT FOR TØMMING AV SLAMAVSKILJARAR, TETTE TANKAR OG
MINIREINSEANLEGG
I KOMMUNANE ASKVOLL, FJALER, HYLLESTAD OG SUNNFJORD**



Vedteken i kommune:	Askvoll	Fjaler	Hyllestad	Sunnfjord
Saknr				
Vedtaksdato				

Fastsett med heimel i forskrift 1. juni 2004 nr. 931 om avgrensing av forureining (ureiningsforskrifta) § 12-6, jf. lov 13. mars 1981 nr. 6 om vern mot ureiningar og om avfall (Ureiningslova) § 26, jf. § 30 tredje ledd og § 34.

§ 1. Føremål

Forskrifta har som føremål å sikre miljømessig, økonomisk og helsemessig forsvarleg innsamling, transport, behandling og disponering av slam frå slamanlegg i kommunane som er deltakrarar i Sunnfjord Miljøverk IKS (SUM).

§ 2. Mynde

SUM er eit interkommunalt renovasjonsselskap for kommunane Askvoll, Fjaler, Hyllestad og Sunnfjord. SUM er av kommunestyra i eigarkommunane tildelt einerett for innsamling, transport og behandling av avløpsslam.

§ 3. Verkeområde

Forskrifta gjeld tømning, transport og behandling av slam frå slamavskiljarar, tette tankar, minireinseanlegg, privat og andre slamanlegg kor kommunen er ureiningsmynde.

Alle eigedommar mv. der det er slike anlegg skal vere med i den kommunale ordninga og betale for tømning

Forskrifta gjeld også for tømning av tette oppsamlingstankar med ubehandla sanitært avløpsvatn og slam jf. Ureiningslova § 26.

Forskrifta fastset retningslinjer for slamgebyr. Kommunestyret fastset slamgebyrets størrelse årleg.

Oljeutskiljarar, feittutskiljarar og oppsamlingstankar for industrielt avløpsvatn eller liknande ikkje-sanitært avløpsvatn er ikkje omfatta av denne forskrifta.

§ 4. Definisjonar

Abonment: Eigar av eigedom som er omfatta av tømmeordninga jf. § 3. Ved bortfeste av eigedom for 30 år eller meir, blir fester rekna som abonnent om ikkje anna er avtalt. Det same gjeld når fester har rett til å få festet forlenga, slik at den samla festetida blir 30 år eller meir.

Avløpsvatn: Alle typar avløp frå hushald, fritidsbustader, verksemder og liknande som er omfatta av kommunale regler for avløps- og reinseanlegg under kommunal godkjenning. Her er også medrekna gråvatn, som er avløpsvatn frå bustadar og hytter utan vassklosett, og svartvatn som er avløpsvatn berre frå toalett.

Ordinær tømning: Planlagt tømning som skjer i den førehandsvarsla perioden kor tømning skjer i aktuelt område etter fastsett tømmefrekvens i samsvar med eigedommens utsleppsløyve.

Ekstratømming: Tømming utanom fastsett tømmeplan. Må bestillast av abonnent og skal utførast innan to veker.

Tømmeplan: Ruteplan, fastsett av SUM, for å gjennomføre ein effektiv og rasjonell tømming av slam for eit større område. Tømmeplan tar omsyn til tømmefrekvens gitt i utsleppsløyvet.

SUM: Den instans som er gjeve ansvar for å utøve forskrifta. (sjå § 2)

Slamanlegg: slamavskiljarar, tette tankar, minireinseanlegg mv. for sanitært avløpsvatn.

Tette oppsamlingstankar: Tankar for oppsamling av sanitærvatn utan avløp.

Unntak frå lovpålagt tømming og kontroll: Eigedom permanent unntatt frå slamtømmingsordninga, der fritak vert gitt av kommunen.

§ 5. Kommunal innsamling av slam

I samsvar med Ureiningslova § 26 er det tvungen kommunal slamtømming frå mindre sanitæranlegg. Alle eigedommar i kommunen kor det oppstår slikt slam er omfatta av slamtømmingsordninga. Ingen kan utføre tømming av slam frå sanitæranlegg utan skriftleg samtykke frå SUM.

Ved tømming av anlegg kor det blir oppdaga feil eller manglar, vil det bli gitt melding vidare til kommunens ureiningsmynde som vil følge opp anlegget i samsvar med ureiningsforskrifta og lokale forskrifter.

Eigar pliktar å halde tilsyn med anlegget. Dersom anlegget ikkje blir tømt med vedteken tømmefrekvens, skal eigaren av anlegget ta kontakt med SUM for å sørge for at tømming blir utført. SUM er ikkje ansvarleg for skader og ulemper pga. tiltetting etc. Abonnenten plikter å halde tilsyn slik at overfløyming ikkje skjer.

Forskrifta gjeld i heile kommunen. Kommunen kan frita einskilde eigedommar eller geografiske område kor det ikkje er mogleg med tilfredsstillande tilkomst.

§ 6 Abonnenten sine plikter

Abonnenten skal sørge for at anlegg som skal tømmast er lett tilgjengeleg for tømming med bil. Overdekking av kumløkk o.l. med snø, is, jord, stein eller anna skal vere fjerna av abonnenten før tømming. Abonnenten er pliktig til å halde ved like eige anlegg og omgåande utbetre skader på anlegget.

Avløpsvatnet skal ikkje bli tilført uønskt stoff som medfører redusert slamkvalitet, redusert reinsegrad, helsefare eller andre miljøulempar.

Abonnenten er pliktig til å melde frå til kommunen om endring i tekniske installasjonar og anleggsutføring, jf. Plan- og bygningslovens føresegner.

Abonnenten plikter å opplyse, samt på eige initiativ å innhente informasjon om tilhøve som kan ha innverknad for eige anlegg.

Abonnenten plikter å innordne seg SUM sin tømmeplan. Det er eigar si plikt å sørgje for at tømming vert utført. Eigar må ta kontakt med SUM dersom tanken skal tømmast utanom den fastsette tømmeplan, eller dersom SUM ikkje har registrert tømmefrekvens i samsvar med forskrifta eller gitt utsleppsløyve.

Berre toalettpapir, avløpsvatn og urin/ekskrement kan skylast ned i tanken. Ved tømming av slamavskiljarar blir innhaldet suge opp og separert, reinsa vatn blir returnert på tanken. Ved tømming av tette septiktankar blir heile tanken tømt utan retur av reinsa vatn. Tanken må ikkje innehalde framandelement som f.eks. Q-tips, bleier, bind, våtserviettar, tekstilar etc. Det er også viktig at tanken ikkje blir tilført større mengder med anna flytande material, til dømes frityrolje. Dette må i staden bli levert i tette behaldarar på en gjenvinningsstasjon. Ureining kan føre til at tanken ikkje lar seg tømme.

Framandelement løyser seg dårleg opp og tettar og øydelegg rør, slargar og filtre i avvatningseiningane. Dersom husstanden gjentatte gonger kastar framandelement eller anna i tanken som skaper driftsproblem for slambehandlinga, kan abonnenten bli belasta med ekstra behandlingsgebyr.

Når ein eigedom med eige slamanlegg blir kopla ut skal det gjennomførast ei sluttømming slik at alt sanitærvatn blir behandla på godkjent måte.

§ 7 Tilkomst eller hindringar

Plassering av nye anlegg må godkjennast av kommunen før utsleppsløyve blir gitt. Det må vere køyrbar tilkomstveg fram til slamanlegget. Tilkomstvegen skal ha snuplass, kurvatur og stigningsforhold slik at det kan køyrast med slambil, evt. anna slamkøyetøy.

Det skal takast mest mogleg omsyn til kva for ei årstid som gir den beste framkomst til den enkelte abonnent. Utover dette har ikkje den som tømmer eller SUM ansvar for skade på og vedlikehald av privat veg og plass, med mindre det kan påvisast aktløyse.

Hele anlegget må kunne tømmast frå same oppstillingsplass, og botntank kan være maksimum 6 meter lågare enn høgaste terrengpunkt mellom botntank og oppstillingsplass. Avstand frå oppstillingsplass på veg og til tank skal være maksimalt 30 m.

SUM eller den som tømmer har ikkje ansvar for skade på og vedlikehald av privat veg og plass, med mindre det kan påvisast aktløyse.

Dersom abonnenten ikkje har køyrbar tilkomstveg for slamtømmekøyetøy, kan SUM pålegge at abonnenten utbetrar tilkomsten, eller at abonnenten sjølv sørger for at slammet blir frakta bort og behandla på ein helse- og miljømessig god måte. Slamhandteringa skal godkjennast av SUM.

§ 8 Tilgjengelegheit til anlegget

Den som tømmer anlegget har rett til å plassere nødvendig utstyr på eigdommen for å få utført tømminga.

Dersom abonnenten etter førehandsvarsel ikkje har klargjort slamanlegget inkl. tilkomstveg for tømming, eller frakta fram slammet mv., blir ikkje ordinær tømming gjennomført. Abonnent må då bestille ekstratømming.

§ 9 SUM sine plikter

SUM plikter å informere om den kommunale ordninga og sørge for at innsamling og behandling av slam frå eigedommar som er omfatta av forskrifta, blir gjennomført.

Tømming av slamanlegg skal gjennomførast etter eit fast mønster. For å dekke abonnentane sine ulike behov skal SUM i tillegg til ordinær tømming kunne tilby ekstratømming.

Skader som skuldast aktløyse frå SUM si side, vil SUM utbetre uavhengig av eigartilhøve til tanken.

Tømminga skal utførast slik at bebuarane ikkje blir sjenert av unødig lukt og støy.

Anlegget skal etterlatast i lukka stand. Grinder, porter, lokk og dører skal lukkast. Innsamlingseiningane skal være slik innretta at tømming og transport kan skje på ein hygienisk og estetisk måte.

SUM har rett til å tilbakeføre rejecktvatn (reinsa avløpsvatn) frå innsamlingseininga til slamavskiljarar. Tette tankar vert heilt tømde. For minireinseanlegg skal bruksrettleiing frå leverandør følgjast, der dei fleste krev at anlegget tømmast heilt.

§ 10 Tømmefrekvens

Type anlegg	Tømmefrekvens
Eigedommar med fast busetnad og med minireinseanlegg	Kvart år
Eigedommar med fast busetnad som er kopla til slamavskiljar	Kvart 2. år
Eigedommar utan fast busetnad (hytte og fritidseigedommar) som er kopla til slamavskiljar	Kvart 4. år
Tette tankar	Kvart år

For minireinseanlegg plikter den einskilde abonnent å inngå serviceavtale ved installasjon av anlegg. Dersom abonnenten ønsker rutinemessig tømming av minireinseanlegg innanfor ordinær tømmeplan kan abonnenten søke kommunen om dette.

Dersom abonnent vil ha endra tømmefrekvens på slamtanken må søknaden stilast til heimkommunen. Det vert ikkje godkjent tømmefrekvens sjeldnare enn kvart 4. år.

SUM sin tømmeplan skal maksimalt variere med åtte veker i høve til fastsett tømmefrekvens og siste utførte tømming.

Kommunen kan pålegge abonnent anna tømmefrekvens viss det er vurdert som naudsynt.

§ 11 Gebyr

Slamgebyret vert fastsett årleg av kommunane i eit eige gebyrvedtak, etter forslag og innstilling frå SUM og i samsvar med Forureiningslova § 34.

Sjølv om abonnenten nektar tømning eller at tømning av ein anna grunn ikkje finn stad skal det likevel betalast gebyr.

Abonnenten skal betale eit årleg gebyr. Slamgebyret gjeld for heile kalendermånader, og reknast frå den første dagen i månaden etter eigedomen blei gebyrpliktig.

Gebyret varierer etter størrelsen på anlegget samt frekvens for tømning.

Gebyr for slamtømning med påkomne renter og kostnader er sikra med lovbestemt pant etter pantelova § 6-1. Om renteplikt ved for sein betaling, tilbakebetaling og inndrivning av slamgebyr gjeld reglane i lov av 6. juni 1975 nr. 29 om eigedomsskatt til kommunane § 26 og § 27 tilsvarende.

§ 12 Unntak

Kommunen kan i spesielle tilfelle og etter søknad, gi dispensasjon frå denne forskrifta. Dersom det er argument for anna tømmeffrekvens enn angitt kan abonnent søkje om endring i denne. Frekvens kan berre justerast slik at dei vert tilpassa ordinære tømmerunder. Søknaden må være grunngitt, og medhald må ikkje medføre ureiningsfare.

Etter søknad kan kommunen gi fritak for gebyr når gebyrpliktig eigedom har stengt av tilførsel av vatn og til tank, og desse er plombert av godkjent rørleggjar. Tanken skal tømmast før plombering. Ved innvilga søknad om fritak blir abonnementet avslutta frå 1. termin etter at stadfesting om plombert tank er mottatt. Kostnader ved plombering og evt. opning blir bestilt/dekt fullt ut av abonnenten.

Kommunen kan i spesielle tilfelle etter søknad gi dispensasjon frå ein eller fleire av føresegner i forskrifta. Det er ei føresetnad at en slik dispensasjon er i tråd med forskriftas formål. Det kan settast vilkår ved dispensasjonen.

§ 13 Klage

Forvaltningslova sine reglar gjeld for behandling av saker etter denne forskrifta.

§ 14 Sanksjoner og straff

Kommunen kan pålegge den enkelte abonnent å utbetre eller etablere nye slamanlegg viss dette er naudsynt for å sikre tilstrekkeleg kapasitet i anlegget, for å sikre god behandling av slammet eller for å hindre at det oppstår unødige utslepp.

Brot på denne forskrifta kan straffast med bøter jf. Ureiningslova kapitel 10 § 79 andre ledd.

§ 15 Ikraftsetjing

Forskrifta trer i kraft 1.1.2026

Denne forskrifta erstattar «*Kommunal forskrift for innsamling m.v. av hushaldningsavfall, tøming av slamavskiljarar, tette tankar m.v. og for gebyr for renovasjon og slamtøming (kalla renovasjonsforskrifta)*.» vedtatt av kommunane Askvoll, Fjaler, Førde, Gaular, Hyllestad, Jølster og Naustdal i følgande vedtak

Vedteken i kommune:	Askvoll	Fjaler	Hyllestad	Sunnfjord
Saknr	08/21	144/20	20/085	121/20